

Ripigliu...

Baddaremu à guerra in corti di la scola
Suldati d'una stonda cù li scusali scuri
È lu profumo longu di sta risa chì svola
Sarà d'inghjostru amaru è di cunfitura

À spissu l'istatina, infiara l'aria bienna
Da schjarisce in li visi, i nosci ochja ingridatti
E tutti li sicreti spartuti dopu cena
Ghjunti à li to labbra, sò basgi impivarati
Middi lumi d'arghjentu, di ramu è di mari
in li vapori strani di la me zitiddina
Ùn firmarà più nimu, era notti, mi pari
E puri la to voci era cusì vicina

Ripigliu...

È pò veni lu tempu, più nudu è più sicretu
Paru à li to oghji d'isuli ch'un sò mei
Chì ciambotta li senza è lu cori più chetu
Brusgendu per i strada u vanu di l'idei
Mimoria vagabonda, immensa è fantina
Inventa lindumani à sentà lu so fiatu
Ch'ormai i to ricordi ùn sò chè pulvarina
U focu'lli so ghjorna m'hà dighjà cunsumatu

Ripigliu...

Middi rimori dati com'è tanti pricheri
È li sapori vani di ciò chì ùn fu fattu
Firmaiani li toi à dì ch'è tù nun c'eri
È tutti sti piaceri ch'eiu ùn t'aghju cuntatu
Middi rimi circati par dì à tremavoci
Ch'eiu ti tinia caru ma l'anni si sò persi
Ti sianu cuncessi sta tarra è una croci
È com'è tistamentu un pocu di sti versi

Ripigliu...